

敕修陝西通志

第八
函
十
冊

通志第七十八卷

紀事三

惠帝元康元年秋九月以趙王倫鎮關中

倫字子彝宣帝第九子也武帝受禪封琅琊郡王咸寧中改封於

趙元康初遷征西將軍開府儀同三司鎮關中倫刑賞失中氏羌

反叛徵還京師

晉書趙王倫傳○按晉室諸王鎮關中者率以失

有事於陝或行軍屯兵足係地方安危始特著之後倣此例

四年夏五月匈奴入上郡據其城

匈奴郝散攻上黨殺長史入守上郡

晉書北狄傳

六年夏匈奴郝度元反

匈奴郝散弟度元帥馮翊北地馬蘭羌盧水胡反攻北地太守張

損死之馮翊太守歐陽建與度元戰建敗績

晉書惠帝紀

張光爲北地

都督氐羗叛太守張損戰沒光以百餘人戍馬蘭山北賊圍之百

餘日光撫屬將士屢出奇兵擊賊破之

張光傳

郝散弟度元率馮翊

北地羗胡攻破二郡自此以後北狄漸盛

北狄傳

詔復以梁王彤鎮關中

彤元康初轉征西將軍代秦王東都督關中軍事尋徵爲衛將軍

錄尚書事行太子太保久之復爲征西大將軍代趙王倫鎮關中

都督涼雍諸軍事置左右長史司馬又領西戎校尉

晉書梁王彤傳

初趙

王倫爲鎮西將軍撓亂關中氐羗反叛乃以梁王彤代之或說華

曰趙王貪昧信用孫秀所在爲亂而秀變詐奸人之雄今可遣梁

王斬秀刈趙之半以謝關右華從之彤許諾秀友人辛冉從西來

言于彤曰氐羗自反非秀之爲故得免死

張華傳

秋八月秦雍氏羌齊萬年反冬十一月遣將軍周處等討之

八月雍州刺史解系又爲度元所破秦雍氏羌悉叛推氏帥齊萬年僭號稱帝圖涇陽十一月遣安西將軍夏侯駿建威將軍周處

等討齊萬年梁王彤屯好時

晉書惠帝紀

周處遷御史中丞凡所糾劾

不避權貴梁王彤犯法處深文按之及齊萬年反朝臣惡處強直皆曰處吳之名將子也忠烈果毅乃使隸夏侯駿西征萬年聞之曰周府君才兼文武若專斷而來不可當也如受制于人此成擒耳既而梁王彤爲征西大將軍都督關中諸軍事陳準知彤將逞宿憾乃言于朝曰駿及梁王皆是貴戚非將帥之才進不求名退不畏咎周處忠勇果勁有怨無援將必喪身宜詔孟觀以精兵萬人爲處前鋒必能殄寇不然彤當使處先驅其敗必也朝廷不從

周處傳

七年春正月將軍周處及齊萬年戰于梁山死之

時賊屯梁山有衆七萬駿逼處以五千兵擊之處曰軍無後繼必至覆敗雖在亡身爲國取恥彤復命處進討乃與振威將軍盧播

雍州刺史解系攻萬年於六陌

今乾州北有六陌鎮

將戰處軍士未食彤促

令速進而絕其後繼自旦及暮斬首萬計絃絕矢盡播系不救左

右勸退處按劍曰是吾効節授命之日何退之爲今諸軍負信勢

必不振我爲大臣以身殉國不亦可乎遂力戰而歿

晉書周處傳○梁山在

乾州城西北

八年秋遣侍御史李苾慰勞漢川流民

元興中氏齊萬年反關西擾亂頻歲大飢百姓流移就穀相與入

漢川者數萬家既至漢中上書求寄食巴蜀朝議不許遣侍御史

李苾持節慰勞且監察之不令入劔閣苾至漢中受流人賂反爲

表曰流民十萬餘口非漢中一郡所能振贍蜀有倉儲宜令就食

朝廷從之由是散在梁益不可禁止

晉書後蜀載記

遣將軍孟觀討齊萬年九年春正月觀擊萬年獲之

氏帥齊萬年反於關中衆數十萬諸將覆敗相繼中書令陳準監張華以趙梁諸王在關中雍容貴戚進不貪功退不惧罪士卒雖衆不爲之用周處喪敗職此之由上下離心難以勝敵以觀沉毅有文武才用乃啟觀討之觀所領宿衛兵皆趨捷勇悍并統關中士卒身當矢石大戰十數皆破之生擒萬年威懾氏羗

晉書孟觀傳元

康中西戎反叛拜靖爲大將軍梁王彤左司馬加蕩寇將軍屯兵

栗邑擊賊敗之遷始平內史

索靖傳

以河間王顥鎮關中

河間王顥元康九年代梁王彤爲平西將軍鎮關中石函之制非

親親不得都督關中顓於諸王爲踈特以賢舉

晉書河間王顓傳

永寧元年夏侯爽起兵始平討趙王倫不克死之

趙王倫篡位齊王冏謀討之前安西叅軍夏侯爽自稱侍御史在始平合衆得數千人以應冏遣信要顓顓遣主簿房陽河間國人張方討擒爽及其黨十數人于長安市腰斬之及冏檄至顓執冏使送之于倫倫徵兵于顓顓遣方率關右健將赴之方至華陰顓聞二王兵盛乃加長史李含龍驤將軍領督護席萇等追方軍迴以應二王義兵至潼關而倫秀已誅天子反正含方各率衆還

晉書

河間王顓傳

太安二年秋七月顓舉兵反冬十一月詔雍州刺史劉沉討之

太安二年河間王顓成都王穎舉兵討長沙王乂帝以乂爲大都

督帥軍禦之

晉書惠帝本紀

劉沉字道真李流亂蜀詔沉以侍中假節討

流行次長安河間王顥請留沉爲軍司後領雍州刺史及張昌作亂詔顥遣沉將州兵萬人征西府五千人自藍田關討之顥不奉詔沉自領州兵至藍田顥又逼奪其衆長沙王乂命沉將武吏四百人還州張方既逼京都王師屢敗王湖祖逖言于乂曰劉沉忠義果毅雍州兵力足制河間宜啟上詔沉發兵襲顥顥窘急必詔張方以自救此計之良也乂從之沉奉詔馳檄四境合七郡之兵及守防諸軍塢壁甲士萬餘人以安定太守衛博新平太守張光安定功曹皇甫澹爲先登襲長安

晉書劉沉傳

永興元年春正月雍州刺史劉沉及顥戰敗死之

顥時頓於鄭縣之高平亭爲東軍聲援聞沉兵起還鎮渭城遣都護虞夔率步騎萬餘人逆沉于好畤接戰夔衆敗顥大懼退入長安果急呼張方沉渡渭而壘顥每遣兵出鬪輒不利沉乘勝攻之

使澹博以精甲五千從長安門而入力戰至顓帳下沉兵來遲顓
軍見澹等無繼氣益倍馮翊太守張輔率衆救顓橫擊之大戰于
府門博父子皆死澹又被擒顓奇澹勇壯將活之澹不爲之屈於
是見殺沉軍遂敗與麾下百餘人南遁爲陳倉令所執沉謂顓曰
知己之顧輕在三之節重不可違君父之詔量彊弱以苟全投袂
之日期之必死蒞臨之戮甘之如薺顓怒鞭之而後腰斬晉書劉
沉傳

劉沉被密詔討河間王顓光起兵助沉謀多不用及二州軍潰爲
顓所擒顓謂光曰前起兵欲作何策光曰劉雍州不用鄙計故令

大王得有今日也顓壯之表爲右衛司馬

張光
傳

冬十一月張方遷帝于長安

冬十一月乙未方請帝謁廟因劫帝幸長安方以所乘車入殿中
帝馳避後園竹中方逼帝升車帝令方具車載宮人寶物軍人因

妻略後宮分爭府藏魏晉已來之積掃地無遺矣河間王顥帥官

屬率騎三萬迎於霸上顥前拜謁帝下車止之以征西府爲宮

晉書

惠帝紀

高光爲廷尉惠帝爲張方所逼幸長安朝臣奔散莫有從者

光獨侍帝而西

高光傳

光熙元年春正月顥殺張方

東海王越起兵徐州西迎大駕關中大懼方謂顥曰方所領猶有

十餘萬衆奉送大駕還洛宮公自留鎮關中方北討博陵如此天

下可小安無復舉手者顥慮事大難濟不許乃遣成都王穎總統

諸軍據河橋以距越初越以張方劫遷車駕天下怨憤唱義與山

東諸侯尅期奉迎先遣說顥令送帝還都與顥分陝而居顥欲從

之而方不同及東軍大捷成都等敗顥乃令方親信將郅輔夜斬

方送首以示東軍

晉書河間王顥傳

夏四月東海王越遣將祁弘入長安奉帝東還

顓遣弘農太守彭隨北地太守刁默距祁弘等於湖弘等與刁默戰默大敗顓走南山弘等所部鮮卑大掠長安殺二萬餘人弘等奉帝還洛陽帝乘牛車行宮籍草

晉書惠帝紀

顓既殺張方尋變計更

遣刁默守潼關東軍破刁默入關顓懼又遣馬瞻郭曄於霸水禦之瞻等戰敗散走顓乘單馬逃于太白山東軍入長安大駕旋以太弟太保梁柳爲鎮西將軍守關中馬瞻等出詣柳因共殺柳於城內瞻等與始平太守梁邁合從迎顓於南山顓初不肯入府長安令蘇衆記室督朱永勸顓表稱柳病卒輒知方事弘農太守裴廙秦國內史賈龕安定太守賈疋等起義討顓斬馬瞻梁邁等東海王越遣督護麋晃率國兵伐顓至鄭顓將牽秀距晃晃斬秀并其二子義軍據有關中顓保城而已

河間王顓傳

惠帝西幸長安以臺

秀爲尚書關東諸軍奉迎大駕以秀爲平北將軍鎮馮翊秀與顓
將馬瞻等將輔顓以守關中顓密遣使就東海王越求迎越遣將
麋晃等迎顓時秀擁衆在馮翊晃不敢進顓長史楊騰前不應越
軍懼越討之欲取秀以自効與馮翊大姓諸嚴詐稱顓命使秀罷
兵秀信之騰遂殺秀于萬年

牽秀傳

懷帝永嘉元年春三月以南陽王模鎮關中

模永嘉初轉征西大將軍開府都督秦雍梁益諸軍事代河間王
顓鎮關中時關中饑荒百姓相噉加以疾癘盜賊公行模力不能
制乃鑄銅人鐘鼎爲釜器以易穀議者非之東海王越表徵模爲
司空遣中書監傅祗代之模謀臣淳于定說模曰關中天府之國
霸王之地今以不能綏撫而還既於聲望有虧又公兄弟唱起大
事而并在朝廷若自強則有專權之罪弱則受制于人非公之利

也模納其言不就徵

晉書南陽王模傳

夏五月秦州流人鄧定反寇漢中梁州刺史張殷討之不克

定等反據城固寇掠漢中刺史張殷遣巴西太守張燕討之定等

饑窘詐降密遣旬氏求救於成成主雄遣其太尉離等將兵二萬

救定與燕戰大破之殷及漢中太守杜孟治棄城走積十餘日離

等引還盡徙漢中民於蜀漢中人旬方白落帥吏民還守南鄭

晉書

後蜀記

二年秋七月關中支胡作亂南陽王模討平之

平陽人劉芒蕩自稱漢後誑誘羗戎僭帝號于馬蘭山支胡五斗

叟郝索聚衆數千爲亂屯新豐與芒蕩合黨征西大將軍南陽王

模使其將淳于定破芒蕩五斗叟並斬之

晉書懷帝紀○按馬蘭山在今同官縣北

四年王如掠沔漢

王如自號大將軍領司雍二州牧大掠沔漢

晉書王如傳

五年

漢主聰嘉平元年

春二月梁州刺史張光復漢中

張光遷材官將軍梁州刺史先是秦州人鄧定等二千餘家饑餓流入漢中保于城固漸為抄盜刺史張殷遣巴西太守張燕討之定饋燕金銀燕喜為之緩師定密結李雄雄遣眾救定燕退定遂進逼漢中太守杜正冲東奔魏興

一統志云漢西城縣魏改魏興郡

殷亦棄官而遁

光不得赴州止于魏興乃結諸郡守共謀進取燕唱言曰漢中荒敗迫近大賊克復之事當俟英雄正冲曰張燕受賊金銀不時進討阻兵緩寇致喪漢中實燕之罪也光于是發怒呵燕令出斬之綏撫荒殘百姓悅服光于是却鎮漢中

晉書張光傳

秋八月漢劉曜寇長安南陽王模出降曜斬之遂據長安

八月劉聰使子粲攻陷長安太尉征西將軍南陽王模遇害長安

遺人四千餘家奔漢中

晉書懷帝紀

模使牙門趙染戍蒲坂染求馮翊

太守不得怒率衆降于劉聰聰使其子祭及染攻長安模使淳於定距之爲染所敗士衆離叛倉庫虛竭軍祭酒韋輔曰事急矣早降可以免模從之染箕踞攘袂數模之罪送詣祭祭殺之

南陽王模傳

劉聰遣趙染劉雅率騎二萬攻南陽王模於長安祭曜率大衆繼之染敗王師於潼關將軍呂毅死之軍至於下邳模乃降染送模於祭祭害模及其子范陽王黎署劉曜爲車騎大將軍開府儀同三司雍州牧改封中山王鎮長安

前趙載記

冬十月馮翊太守索綝雍州刺史賈疋等擊破劉曜於長安

索綝爲南陽王模從事中郎劉聰侵掠關東以綝爲奮威將軍以禦之斬聰將呂逸又破聰黨劉豐遷新平太守聰將蘇鐵劉五斗等掠劫三輔除綝安西將軍馮翊太守綝有威惠華夷向服賊不

敢犯及懷帝蒙塵長安又陷模被害絃泣曰與其俱死寧爲伍子胥乃赴安定與雍州刺史賈疋扶風太守梁綜安夷護軍麴允等糾合義衆頻破賊黨脩復舊館遷定宗廟進救新平絃手擒賊帥李羌與閭謁立秦王爲皇太子晉書索靖傳附劉曜既據長安安定太守賈疋及諸氏羌皆送質任唯雍州刺史麴特新平太守竺恢固守不降護軍麴允平陽令梁肅自京兆南山將奔安定遇疋任子於陰密擁還臨涇推疋爲平西將軍率衆五萬攻曜於長安扶風太守梁綜及麴特竺恢等亦率衆十萬會之曜遣劉雅趙染來距敗績而還曜又盡長安銳卒與諸軍戰於黃邱曜衆大敗退保甘渠杜人王禕紀特等攻劉粲於新豐粲還平陽曜攻陷池陽掠萬餘

人歸於長安

前趙載記

十二月秦王業入於雍城

閻鼎天水人初爲豫州刺史屯許昌遭母喪乃於密縣鳩聚西州
流人數千欲還鄉里值京師失守秦王出奔密中司空荀藩藩弟
司隸校尉組及左長史劉疇太傅參軍騶捷僉以鼎有才用且手
握強兵假鼎冠軍將軍豫州刺史鼎少有大志因西土人思歸欲
立功鄉里乃與撫軍長史王毗司馬傅遜懷翼戴秦王之計謂疇
捷等曰山東非霸王處不如關中河陽令傅暢遣鼎書勸奉秦王
過洛陽謁拜山陵徑據長安綏合夷晉興起義衆尅復宗廟雪社
稷之恥鼎得書便欲詣洛流人謂北道近河懼有抄截欲南自武
關向長安疇等皆山東人不願西入並逃散鼎遂奉秦王行止上
洛爲山賊所襲殺百餘人率餘衆西至藍田時劉聰向長安爲雍
州刺史賈疋所逐走還平陽疋遣人奉迎秦王遂至長安晉書閻
鼎傳
鼎與業至藍田遣人告疋疋遣兵迎之入於雍城使梁綜以兵衛